

十三日。陈敬如开示法国有学问者十一人：曰陆路提督、监督机器图（官）〔式〕院莫阑；曰水师提督、监督天文台穆削；曰水师总监工都布依得罗蒙，亦上议院绅也；曰格致翰林院总裁飞素；曰格致翰林、草木园监督削飞尔；曰化学掌教、男爵得那阿；曰翰林院副总裁、矿务学堂监督多白来；曰格致翰林、草木园监督得加得尔发士；曰化学掌教都玛；曰算学掌教贝阿得朗；曰文字翰林、史学科干迷里陆赛。云由得那阿开来。得那阿治化学绝精。赫德自爱尔兰回，枉见。言新得电报，驻俄公使仍派崇地山。晚赴兵部伯来勒茶会。男女累千人，无一相识者。花园灯烛辉煌，电气灯引照园中石像，殊有奇景。致黎莼斋、姚彦嘉、德在初、凤夔九公信。

十四日。日意格、高底亚陪游《费家吼》新报局。其总办密尔麦桑已赴乡，副总办曼牙陪游。视伦敦《代模斯》新报，不过四分之一。凡为刷印机器四架，检字及折叠新报，皆用人力，无机器。每夜尽半夜之力，编检印刷。凡折叠女工七十人，日间但检还所编字母而已。每日八万张，编号包送者四万，零买五万。用纸至十五捆之多。所印刷者，皆检字压板倾铅为之，套入机器圆轮，前后各一，每机器一转，前后上下得四纸。亦有平铺压板者。机器各出新式，而大致则同。其副总办并为置酒。接黎莼斋信，知伦敦茶会日必二三起，巴黎绅民不若伦敦应酬之繁也。

十五日。礼拜，为西历七月十四日。接上海文报局四月十七日由法公司递来七十七号、四月廿四日由英公司递来七十八号两次包封，内李伯相公文二角一咨片奏薛福成丁忧，请撤销德国参赞；一咨奉上谕着照所请撤销，上海道申文一角呈报联芳整装银两，汇京投纳，唐景星、周瀛士、冯瑞光，竹儒之弟三信，及四月十三日戊字四号家信，知适李氏女已得一男。又得胡玉玠、黄泳清各信。回拜般德、赫德两

处，并诣德国公使问巴兰德消息。晚邀日意格、李丹崖、魏季渚、罗清亭、吴焕其、李叔芸、陈鹤亭、郑景溪、陈咏裳、杨秉清、林叔和、严又陵、方益堂、萨鼎茗、罗稷臣诸人晚酌。

十六日。高的亚陪游比弗立若代葛安那学那尔<sup>①</sup>，法国藏书处也，为西洋第一富藏之区。总办谛理勒，亦最有名。所藏凡分四院。埃及、希腊古碑及二千年前房屋雕刻人物，到处陈列，与汉时礼堂图及石阙遗像形式正同。其四院：一曰古钱。法国二千余年金、银、铜三种大小钱式，远及各国，如中国及安南、日本皆备。宝星印信，变易多端，并存其式，杂及珍宝，并环列石刻、古铜、古磁、古瓦大小数千事。其爵杯有为犀、象首曲着案，后为环柄，斜抱枝拒，云此埃及古时酒缸也。亦有为角觚者。其瓦器尤多中国遗式。用此知埃及二千年前必与中国通，其文字亦古篆籀之遗。守者云：古器物十万馀，择其尤者陈列，不过六千。二曰图画，亦兼及各国。平定两金川巨册，云系西人用铜板为之，绝工细。又康熙二十五年图（书）〔画〕帝王圣贤名臣像百数十幅，藏之兴德寺，常岫为之题后。兴德寺不知在何所，今人亦无知者。又有大天文地球二架，高约丈许，有机运动。其天文作四十八象，或如狮，或如鱼，或如宝带，以观星气。《梅氏丛书》亦言及之。（二）〔三〕曰抄书，九万卷，各国书籍分屋贮之。凡五六厅，或两层三层。其本国书籍则皆抄写无板者。中国书二万四千帙，凡为目录四巨册，明板佳者甚多。四曰刻板书，是为藏书。正屋有大圆厅，容三百余人，设几案以俟相就观书者，高约三丈，四围设橱贮书。后有平台，扩以曲栏，为主书者坐处，旁设目录数十巨册。左旁高架四，用二十六字母编书名小片，宽广二寸许。

<sup>①</sup>比弗立若代葛安那学那尔，Bibliothèque Nationale（国立图书馆）的音译。